



Opedal Grunneigarlag v/ Knut Opedal

Saksbehandlar, innvalstelefon

Øistein Aasland, 5557 2322

Løyve til oppføring av permanent bru over elva Kjølø ved Opesjo - Hardangervidda nasjonalpark

Statsforvaltaren i Vestland gjev Opedal Grunneigarlag v/ leiar Knut Opedal løyve til å bygge ei permanent gangbru over elva Kjølø på veg til stølen Opesjo i Ullensvang kommune etter verneforskrifta for Hardangervidda nasjonalpark.

For å heve den opphavlege brua kan det støypast brukar på kvar side av elva, og forankre desse i fjell. Oppå desse brukara kan det leggjast stolpar og tredekke, samt eit rekkverk å halde seg i på eine sida.

Det er pkt. 4.1.3h. i verneforskrifta; "Bygging av bruer og klopper" som er nytta som heimel for vedtaket. Det er sett vilkår til løyve.

Vi viser til søknaden frå Opedal Grunneigarlag v/ leiar Knut Opedal, sendt inn med e-post den 25. juni 2022.

Bakgrunn for søknaden

Søkjaren, Opedal Grunneigarlag v/ leiar Knut Opedal søker om å trygge overgangen over elva Kjølø, da det ved høg vassføring er krevjande å kome over den brua som ligg der i dag. Grunneigarlaget har fleire gonger måtta fiksa på den eksisterande brua, da den har vore tatt av flaum. No ynskjer dei å lage ei permanent løysing, som vert liggjande til tross for høgare vassføring, slik at forseringa blir tryggare for både born og vaksne på veg til stølen Opesjo. Sjølv om dette tiltaket har størst betydning for alle med støl på Opesjo, ser grunneigarlaget at det stadig dukkar opp fleire turgåarar på denne traseen som vil ha nytte av tiltaket. For å få ei permanent løysing som blir liggjande, må ein støype brukar på kvar side, som stolpane kan festast i. Desse brukara må være om lag 50 cm høge på kvar side. Dette for å unngå at sjølve brua vert teken av Kjølø ved høg vassføring. Grunneigarlaget vil framleis ta inn og ut stolpar og dekket kvar sesong.

Grunneigarlaget søker med dette om å få støype og forankre i fjell to stykk brukar. Eksakt mål på brukara er vanskeleg å seie noko eksakt om, då dette må tilpassast terrenget på kvar side av elva.



Dei ynskjer å lage desse så små som mogleg ift både kostnader og det visuelle. Oppå desse brukara vil dei feste dagens stolpar og tredekke, samt eit rekkverk å halde seg i på eine sida. Området brua er tenkt plassert på er privat område eigd av Opedal grunneigarlag, så dei treng ikkje løyve frå andre grunneigarar. Opedal grunneigarlag opplyser at dei har planlagd dugnad på stølen den 9. juli 2022.



Kart over plassering av den permanente brua vist med raud pil.

Vår vurdering

Statsforvaltaren viser til verneforskrifta for Hardangervidda nasjonalpark og til Forvaltningsplanen for Hardangervidda nasjonalpark med landskapsvernområde (godkjent i 2011). Det er pkt. 4.1.3h. i verneforskrifta; "Bygging av bruer og klopper" som må nyttast som heimelsgrunnlag for denne søknaden.

Statsforvaltaren er samd i at det er viktig at vegen opp til Opesjo er trygg og farbar også når Kjølo har stor vassføring. Og at dette gjerast best ved at ein legg brua høgare over elva enn den ligg i dag. Dette må gjerast ved å støype brukar på kvar side av elva.

Søknaden om å skifte ut brua over Kjølo i Ullensvang kommune er vurdert etter naturmangfaldlova §§ 8-12.:

§ 8 kunnskapsgrunnlag: Kunnskapsgrunnlag i denne saka byggjer på opplysningar gitt i søknaden. Den eksisterande brua er tatt av flaum fleire gonger, og det er utrygt å ferdast over den når Kjølo går flaumstor. Det er viktig at eventuelle rester frå den gamle brua vert rydda og tatt ut av nasjonalparken.

§ 9 føre-var-prinsippet: Slik vi ser det vil det ikkje være fare for at den planlagde utskiftinga av brua vil ha ukjende, store negative konsekvensar for verneverdiane.

§ 10 økosystemtilnærming og samla belastning: Vi kan ikkje sjå at det omsøkte tiltaket vil auke den samla belastninga for området i særleg grad. Vi ser ikkje for oss at ei god og sikker bru vil auke trafikken innover i nasjonalparken.

§ 11 kostnadene ved miljøforringing skal berast av tiltakshavar: Vi ser ikkje at det er relevant å vurdere dette, då det ikkje er stor fare for miljøforringing ved gjennomføring av tiltaket.

§ 12 miljøforsvarlege teknikkar og driftsmetode: Ut over at eventuelle restar frå den gamle øydelagde brua og byggjeavfall frå den nye må handterast på ein forsvarleg måte, så har vi ingen merknader til dette punktet.



Det er viktig at tiltakshavar/søklar planlegg anleggsperioden og transporten slik at verknaden av arbeidet og transporten vert så liten og kortvarig som mogleg. Transport av materialar og utstyr i samband med støyping av brukara må avklarast med Tilsynsutvalet i Vestland.

Saka har ikkje vore ute på høyring hjå dei vanlege instansane, da Statsforvaltaren vurderte at saka ikkje er særleg omfattande og at den ikkje har negativ innverknad på verneverdiane, samt at det hasta litt – da dugnaden er planlagt gjennomført tidleg i juli.

Vedtak

Statsforvaltaren i Vestland gjev Opedal Grunneigarlag v/ leiar Knut Opedal løyve til å bygge ei permanent gangbru over elva Kjølø på veg til stølen Opesjo i Ullensvang kommune etter verneforskrifta for Hardangervidda nasjonalpark.

For å heve den opphavlege brua kan det støypast brukar på kvar side av elva, og forankre desse i fjell. Oppå desse brukara kan det leggjast stolpar og tredekke, samt eit rekkverk å halde seg i på eine sida.

Det er pkt. 4.1.3h. i verneforskrifta; "Bygging av bruer og klopper" som er nytta som heimel for vedtaket.

Det vert sett følgjande vilkår i løyvet:

- Brukara kan støypast i ein høgde på om lag 50 cm. Høgda må tilpassast terrenget på kvar side av elva. Dei kan og forankrast i fjell slik at dei står støtt og ikkje vert tatt av vassføring, isgang eller snø. På desse brukara skal det leggjast festast bærebjelkar/stolpar, oppå dette leggjast det eit brudekke/treplating, og det kan lagast til eit rekkverk av treverk på den eine sida, slik det er i dag.
- Brukara skal støypast på same stad som den gamle brua ligg (sjå kart over).
- Restar etter den gamle brua (som ikkje nyttast til den nye brua) og eventuelt bygningsavfall etter den nye brua må takast ut av nasjonalparken og leverast til godkjent mottak.
- Dersom det oppstår uventa problem under byggeprosessen, så skal det takast kontakt med forvaltninga.
- Statsforvaltaren skal ha melding så snart byggearbeidet er ferdig, slik at forvaltninga kan foreta ein kontroll om bygget er i tråd med løyve.
- Byggjearbeid skal vere avslutta og plassen rydda innan 1. oktober 2022.

Vedtaket kan påklagast til Miljødirektoratet av part i saka eller andre med rettsleg klageinteresse, jf. forvaltningslova § 28. Klagefrist er 3 veker etter at ein er kjent med vedtaket. Klage skal stilast til Miljødirektoratet, men skal sendast til Statsforvaltaren i Vestland.

Med helsing

Stein Byrkjeland
fagdirektør

Øistein Aasland
seniorrådgjevar

Dokumentet er elektronisk godkjent



Kopi til:

Ullensvang kommune

Tilsynsutvalet i Vestland - for Hardangervidda nasjonalpark

Villreinnemnda for Hardangerviddaområdet

Vestland fylkeskommune

SNO-Hardangervidda